

GET TOGETHER – SIN VIA TRAS LA SVIZRA

da Silvana Derungs

Dals 12 da fanadur fin ils 14 d'avust 2010 duai avoir lieu in viadi atras l'entira Svizra per sensibilisar la populaziun per la quadrilinguitad en Svizra. Lantschà è quest project da Get-Together.

L'uniun Get-Together vul promover la chapientscha vicendaivla da las quatter regiuns linguistics cun reunir persunas da tut las parts dal pajais e las animar da s'occupar cun la quadrilinguitad.

Viver las linguas cun ir a pe

Duas gruppas da viandar duain traversar la stad 2010 – dals 12 da fanadur fin ils 14 d'avust – a pe tut las quatter regiuns linguistics da la Svizra. Ina gruppa parta da Geneva, l'autra da Müstair. La ruta da viadi suonda la «senda culturala svizra» dals Amis da la Natira da la Svizra. La finamira da la senda culturala n'è betg mo da mussar ina Svizra tenor ils clichés, mabain da mussar la Svizra cun sias fatschas multifaras – ed a quellas appartegnan p.ex. era tschancuns cun autostrada.

En la vischinanza dal center geografic svizzer, l'Alp Älggi en la Svizra centrala, duain las duas gruppas lura s'entupar. Ensem cuntinuescha il viadi lura fin a Berna, nua che duai avoir lieu ils 15 d'avust ina gronda festa sin la piazza federala.

Durant il viadi vegnan realisads – mintgamai ensem cun la populaziun locala – divers dis da project en connex cun la quadri- e la plurilinguitad. Sa chapescha ch'ins na sto betg esser da la partida davent da l'entschatta fin a la fin. Mintgina e mintgin è envidà dad accompagnar las gruppas da viadi durant pliras emnas, plirs dis, in di u era mo inqual ura.

Tgi vul crear in cudesch?

Il viadi ed ils inscuters durant quel viadi duain sa chapescha era vegnir documentads. Sin il magazin online Tink.ch pon quels ch'èn restads a chasa persequitar via blog tge che capita durant il viadi. En furma dad in cudesch (sche las finanzas lubeschan) duai il viadi vegnir documentà a moda pli durabla – cun ina descripciun dal viadi e sche pussaivel cun preschentar atgnadads culturalas e geograficas en ils lieus da pausa.

Per quest cudesch tschertga Get-Together ina

gruppa da project. Tgi che vul s'engaschar (i dovra p.ex. glied per la lavur da medias, per la coordinaziun dal project, per la creaziun dal cudesch) duai s'infurmar tar Ramona Schneider, la manadra da project da Get-Together (ramona.schneider@get-together.ch). Il cumenzament da favrer datti lura ina sesida d'infurmaziun.

Tgi che vul savair dapli da las activitads da Get-Together ed esser orientà davart il viadi durant la stad: www.get-together.ch.

